

JESÚS KRISTU – FONTE ITA NIA ESPERANSA

1. Rona Liafuan: 1Ti 1,1-2

Paulo, Kristu Jesus nia apóstolu tuir ukun-fuan husi Maromak ita-nia Salvadór no husi Kristu Jezús ita-nia esperansa, ba Timóteo, ha'u-nia oan loos iha fiar: Grasa, mizerikórdia no dame husi Aman no Kristu Jesus ita-nia Na'í.

2. Hela nafatin iha Liafuan

Ho afirmasaun kmanek sira-ne'e Apóstolu Paulo hahú nia surat ba Timóteo, nia oan iha fiar, hodi foka kedas ba hanorin fundamentál: Jezús Kristu mak Ida-ne'ebé mate no moris-hi'as ba salvasaun umanidade nian (1 Tim 2,6). Nune'e, Nia, mak ita-nia esperansa. Títulu "Jezús Kristu" familiar ba autór sira Testamentu Foun nian no ba liturjia sarani, tanba identifika ho klaru pesoa istórika Jezús Nazaré nian nu'udar Maromak nia Oan-Mane ne'ebé halo ema, haruka husi Maromak ba salvasaun umanidade nian. Paulo, maibé, uza dala barak iha surat ida-ne'e iha forma invertida "Kristu Jezús" (1 Tim 1:1-2 [dala 3]; 1 Tim 1:15 no 1 Tim 2:5-6), hodi subliña Jezús nia knaar mesiániku: Nia de'it maka Ida-ne'ebé ema hotu hein, Nia de'it maka Ida-ne'ebé haruka iha sentidu tomak, tanba Nia de'it maka iha sentidu ba ema tomak (kf. At 9. 22).

Jezús "kuda Liafuan"¹ sira-ne'e to'o rohan, hodi fó ba sira luan no kle'an, hodi bazeia ba esperansa iha Maromak rasik, ne'ebé fiél, domin-na'in no ne'ebé kumpre ninia promesa sira. Nu'udar Oan-Mane mesak, Kristu no Maksoin, Nia mak "mediadór entre Maromak no ema, ema Kristu Jezús, ne'ebé fó-An nu'udar sacrificio ba ema hotu" (1 Tim 2,5-6).

Bento XVI subliña esperansa sarani nia úniku, hodi destaka katak ida-ne'e "hanesan ema ida", "iha oin ida", "iha naran ida".² Iha Ensíklíka *Spe Salvi* nia afirma katak «Maromak maka fundasaun esperansa nian – la'ós maromak ruma, maibé katak Maromak ne'ebé iha oin umanu no ne'ebé hadomi ita to'o rohan: ema ida-idak no umanidade tomak».³

Moris iha esperansa ohin mak konvite ida atu esperimenta iha modu klean relasaun pesoál no domin nian ho Maromak iha Jezús Kristu, ne'e mak desizaun atu tau beibeik «Kristu iha sentru ita-nia moris no mundu nian, tanba Nia mak ita-nia esperansa, esperansa Kreda nian no umanidade tomak nian!»⁴

Tanba Nia mak Ida ne'ebé Moris, "buat hotu ne'ebé Nia kona sai joven, sai foun no nakonu ho moris."⁵ Ita, tanba ne'e, simu bolun atu moris iha esperansa, katak, atu liga ita-nia moris ba Jezús Kristu nian, atu sai nafatin peregrinu esperansa nian ba Maromak no ba ita-nia maluk.

Serteza katak «Nunka buat ida bele haketak ita husi Maromak nia domin» (Rm 8,39) ne'e mak ânkora ne'ebé kaer metin ita-nia moris: Maromak prezente nafatin, nia akompaña ita no hadomi ita, nia husik ita atu moris ho ksolok, atu fó sentidu ba ita-nia ezisténsia no atu transmite esperansa ne'e ba mundu ohin nian.

Ho ninia domin ne'ebé maka'as ba Kristu, Saun Paulo sai sasin ida ne'ebé kredível ba esperansa ne'ebé la nakdoko no domin fiél iha Maromak. Nia Apóstolu ida tuir vokasaun; nia iha aten-barani atu renunsia nia an rasik, atu tuir Na'í nia hakarak, atu hadomi lahó rezerva, atu moris no mate ba Nia. Nia moris tomak ninia misaun atu fó sai Evanjellu esperansa nian, hodi nafatin iha ligasaun klean ho misaun salvasaun Jezús Kristu nian.

1 Cf. VATICANO II, *Dichiarazione Nostra Aetate*, n.2; *Decreto Ad Gentes*, nn. 11.18.

2 Cf. GARCÍA GUILLEN Domingo, *Khuôn Mặt Hy Vọng: Thông điệp Spe Salvi của Đức Bênêđictô XVI trong bối cảnh Thần học hiện đại [Il Volto della Speranza: Il messaggio di Spe Salvi di Papa Benedetto XVI nel contesto della Teologia moderna]*, in TRUNG TÂM HỌC VẤN ĐẠ MINH, *Thời sự thần học* (2015)69, 36-62.

3 BENEDETTO XVI, *Spe Salvi*, n.31.

4 MARTOGLIO Stefano, *Ancorati alla speranza, pellegrini con i giovani*, *Strenna* 2025, p.5.

5 FRANCESCO, *Christus Vivit*, n.1.

3. Naroman husi Liafuan

Esperansa tau ita iha komuñau klean ho Maromak, sentidu ita-nia moris nian, Ida ne'ebé ita hakarak tebes. Papa Francisco hakerek: «Ba ema hotu, sai momentu enkontru moris no pesoál nian ho Na'i Jezús, "odamatan" salvasaun nian (kf. Jo 10,7.9); ho Nia, ne'ebé Kreda iha misaun atu fó sai nafatin, iha fatin hotu-hotu no ba ema hotu nu'udar «ita-nia esperansa» (1 Tim 1,1).⁶

Iha tradisaun saleziana, mehi kona-ba Koluna Rua mak bolu ida ba Don Bosco nia oan-mane no oan-feto ida-idak atu moris iha uniaun ho Jezús iha Eukaristia no iha devosaun ba Maria Auxiliadora. Ai-riin rua ne'e reprezenta fundasaun sólidu ne'ebé fó kbiit atu moris vokasaun no misaun iha mundu loron-loron. Don Bosco experimeta kle'an forsa espirituál ne'ebé suli husi Eukaristia no Sakramentu Rekonsiliaun. Nia moris beibeik iha Maromak nia prezensa, hanesan nia haree Invizível, ho konfiansa klean iha providénsia divina. Tuir ninia ezemplu, ita simu bolun atu selebra moris ho ksolok no serenidade, hodi konfia ita-nia an tomak ba Jezús no husik ita-nia an hetan orientasaun husi Espíritu Santu. Atu ita-nia fuan fila nafatin ba Maromak, "hakarak realidade lalehan nian no dirije ita-nia hanoin no espíritu ba buat sira lalehan nian" (kf. Kol 3,1-2).

Nune'e mós, espiritualidade eukarística husik marka ne'ebé labele halako iha esperiénsia spiritual Madre Mazzarello nian. Janela Valponasca nian no dalan sira Mornese nian evoka nafatin ninia devosaun maka'as no ninia hakarak maka'as atu hamutuk ho Jezús. Madre Mazzarello dala barak rekomenda ba nia irmán sira: «Moris iha uniaun íntima ho Jezús, serbisu de'it atu halo kontente nia» (L 22). Nia konvida sira atu hetan sira-nia an iha Jezús nia Futar Fuan Sagradu, sentru ninia moris nian, hodi sunu ahi iha ninia irmán sira no foin-sa'e sira-nia fuan ahi fiar, domin no esperansa nian.

Ohin, ho fuan ne'ebé anima ho domin ne'ebé maka'as ba Maromak, ba irmán sira iha comunidade no ba foin-sa'e sira, FMA ida-idak iha ninia asaun rasik – kontemplasaun simu bolun atu atualiza esperiénsia espirituál Don Bosco no Madre Mazzarello nian ho fidelidade no criatividade. Ho dalan ida-ne'e nia sei sai sasin esperansa nian, ho abut iha valór rohan-laek sira ne'ebé moris fiar nian fó, liuhusi grasa, mizerikórdia no dame ne'ebé Saun Paulo ko'alia ba Timóteo.

4. Reza ho Liafuan

Iha silénsiu, ha'u rona Maromak nia Liafuan, ha'u husik ha'u-nia an gia husi Espíritu, atu ha'u-nia fuan moris iha gratidaun, haraik-an no autokonxiénsia, hafoun ha'u-nia moris iha ha'u-nia relasaun ho Maromak no ho ema seluk.

Pergunta balun ba reflesaun:

- Saida mak ha'u tau ha'u-nia esperansa?
- Ha'u husik ha'u-nia an atu Maromak nia domin dada ha'u atu goza moris iha komuñau ho Nia, moris iha fiar, domin no konfiansa?
- Saida maka ha'u presiza halo liu atu moris ho kompletu virtude Esperansa nian?
- Oinsá ha'u bele sunu ahi esperansa no domin nian iha foin-sa'e sira no iha ambiente ne'ebé ha'u moris bá?

5. Hamutuk ho Maria Moris tuir Liafuan

Maria moris esperiénsia esperansa nian ne'ebé kle'an hahú hosi momentu ne'ebé nia simu anju nia mensajen. Nia dehan "sim" ba Maromak nia hakarak, tuir Ninia planu. Ho dalan ida-ne'e Maromak nia Oan-Mane sai sentru ba nia moris, hodi hakonu no dirije nia. Maria, Maromak nia Inan, kompara ho Fitun Tasi nian - Stella Maris. Loos duni, Papa Bento XVI hakerek: «Sé mak liu fali Maria bele sai fitun esperansa nian mai ita – nia ne'ebé ho ninia "Sim" loke odamatan ita-nia mundu nian ba Maromak rasik; nia ne'ebé sai Arka Aliansa moris nian, iha ne'ebé Maromak sai isin, sai ita ida, harii nia tenda iha ita-nia leet (kf Jo 1,14)?».⁷ Maria gia ita ba Esperansa loos, ne'ebé mak Jezús Kristu, Ninia Oan.

O Virjem esperansa nian, Inan no Maestra, tulun ha'u atu haklaken Esperansa hamutuk ho ita ba mundu ohin loron. Amen

⁶ FRANCESCO, *Spes non confundit. Bolla di indizione del Giubileo Ordinario dell'Anno 2025, n.1.*

⁷ BENEDETTO XVI, *Spe Salvi, n.49.*

